

Ina lescha che nus stuain salvar

En noss chantun n'è il tudestg betg periclità, anzi, el avanza cuntinuadamain en ils territoris rumantschs e per part era en quels da lingua taliana. Da las trais linguas chantunales è il tudestg la lingua la pli fortunada, perquai ch'ella dispona d'ina gronda forza economica, che deriva surtut dals centers urbans al nord da las Alps. Ils abitants dal Grischun talian e rumantsch èn damai sfurzads da s'adattar e d'esser plurilings. Noss chantun ha dentant anc adina trais linguas uffizialas ed igl è l'incumbensa da las autoritads da proteger las minoritads. Per defender ils pli flaivels ston ins avair reglas. La lescha da linguas, sin la quala las minoritads spetgan già daditg, è damai fitg bainvegnida. Igl è ina lescha moderada, acceptada unanimamain dal Cussegl grond. Ed ins na chapescha betg la vehementa critica da quels che vulan sbittar ella.

Il fatg ch'il chantun Grischun engascha – sche las qualificaziuns èn las medemas – cun preferenza candidatas u candidats che san duas u trais linguas chantunales, na po betg disturbar. Per ademplir sias incumbensas tschernà il chantun las persunas las pli qualificadas.

E l'administraziun chantunala sto pudair communitgar cun tut ils burgais.

Era il fatg che la lescha favurisescha la plurilinguitad tranter ils giuvenils cun promover las scolas bilinguas ed il barat da classas tranter las cuminanze linguisticas, na po betg disturbar. Esser pluriling è in avantag per tuts.

Ed era il fatg ch'ins na vul betg perder anc dapli territori rumantsch e pretenda perquai en l'avegnir ina maioritad da 60% per germanisar ina vischnanca, na po betg disturbar. Per nus tuts è nossa trilinguitad ina gronda valur culturala. Tgi che vul ir a star en in auter chantun da la Svizra u schizunt a l'exteriur, sa ch'igl è indispensabel d'emprender la lingua tradiziunala per s'integrar en la nova cuminanza. Quai vala era per quels che van a star en in dals oramai paucs vitgs rumantschs. Tenor la Constituziun federala (art. 70) è il chantun Grischun obligà da resguardar la cumposiziun linguistica tradiziunala da las regiuns e las minoritads linguisticas tradiziunales. E gist quai è l'incumbensa da la nova lescha, moderada e realistica. E tuttina sugereschan ils aderents dal referendum che la lescha portia dischavantags a la maioritad. Ma

las cifras mussan cleramain: il rumantsch (15%) ed il talian (10%) na pon betg smanatschar la maioritad tudestga (bunamain 70%). La lescha da linguas dal chantun Grischun na fa nagut auter che augmentar la valur da nossa trilinguitad ed equilibrar in pau la bilantscha a favur da las minoritads. Pertge che la solidaritad ed il respect uneschan e rinforzan ina cuminanza plurilingua, era en il chantun Grischun, era en il futur. Lain pia salvar la lescha da linguas e votar gea ils 17 da zercladur!

Silva Semadeni, Passugg/Araschgen

■ SOLOTURN

Leta Semadeni prelegia

(anr/vi) Proxim venderdi prelegia l'autura ladina Leta Semadeni als Dis da litteratura a Soloturn. L'occurrenza ha lieu en il Landhaus e va da las 11.00 fin las 11.45. Giovanni Netzer moderescha la prelecziun.